

Atortut innaallagiartortut eqqaanni innaallagiartortuunngitsunik sulinermik ingerlatsinermi isumannaallisaaneq pillugu Namminersorlutik Oqartussat nalunaarutaat

§ 6, imm 1 naapertorlugu Sanaartukkat innaallagissamut atugassat, innaallagissamut ikkussuinerit aamma atortut innaallagiartortut pillugit Inatsisartut peqqussutaat nr. 12, 3. november 1994-imeersumi, Inatsisartut inatsisaanni nr. 19, 12. juni 2019-imeersumi allanngortinneqartumi, Innaallagissiornermut Oqartussanit aalajangersaneqassaaq:

Kapitali 1

Atuuffia aamma nassuiaatit

Atuuffia

§ 1. Nalunaarut manna atortut innaallagiartortut eqqaanni innaallagiartortuunngitsunik privatimik imaluunniit inuussutissarsiornermut atatillugu sulinermit atuuppoq.

Imm. 2. Nalunaarut atuutinngilaq;

- 1) suliaqarnermi, suliaq suliffeqarfimmit atortumut innaallagiartortumut ingerlatsinermit akisussaasuusumit suliarineqarpat imaluunniit tassannga aqunneqarpat,
- 2) suliaqarnermi, suliaq suliffeqarfimmit atortumut innaallagiartortumut ingerlatsinermit akisussaasuusumit isumaqatigiissuteqarneq naapertorlugu ingerlanneqarpat, tassa Innaallagissiornermut Oqartussat najoqqutaliaanni normu 3-imi atortunik innaallagiartortunik ingerlatsinermi isumannaallisaaneq pillugu kapitali 8 naapertorlugu suliarineqarpat,
- 3) inuit privatimik nalinginnaasumik naatsiivimmi suliaqarneranni aamma nunalerinermi imaluunniit
- 4) aqqusinikkut tamat ingerlaffigisartagaatigut assartuinermi aamma nalinginnaasumik ingerlanermi.

Nassuiaatit

§ 2. Nalunaarummi makku imatut paasineqassapput:

- 1) Kabelinik nunakkoortinneqartunik nalunaaqutsersuineq imaluunniit matoorinermit atortut: Atortut kabelit nunamiittut qaavinut inissinneqarsimasut tassuuna ilimasaarutiginiarlugu ataani kabeleqartoq, taamaaliornikkut siunertarineqarluni nunami assaanermi kabelit ajoquserneqannginnissaat.
- 2) Entreprenøri: Kinaluunniit illumik suliaqarnermik, aqqusinermi suliaqarnermik, nunalerinermik

suliaqarnermik, maskiinaqarfinnik imaluunniit assigisaannik, tassunga ilanngullugit assartuineq, suliaqartuq imaluunniit sulisuminik suliaqartitsisoq.

3) Atortut innaallagissamik sakkortuumik sarfallit: Atortut innaallagiartortut 1000 V ac. imaluunniit 1500 V dc. sinnerlugit sarfaqartut.

4) Makkua qanittuanni: Suliaqarnermi, tassani ungasissutsit nalunaarneqarsimasut qaangerneqarnissaannut ungasissuseq mianerisassaalluni.

5) Kabelit nunamiittut: Kabeli nunamut inissinneqarsimasuq taanna tassaalluni ingerlaviit tapinnaallisarneqarnatik imaluunniit aqqut ataaseq imaluunniit arlallit qallerneqarsimanngitsut, allamik qaavatigut qallerneqarsimasut.

6) Kabelinut sikaaviit: Sikaaviit imaluunniit assigisaat kabelinik nunameersunik nunap qaavani katiteriffissat.

7) Kabelinut karsi: Karsi kabelinut nunamiittunut nunami katiteriffissaq.

8) Atortut sakkukitsumik sarfallit: Atortut innaallagiartortut 1000 V ac. angullugu imaluunniit 1500 V dc. angullugu sarfallit.

9) Ledningit silaannakkoortut: Ledningit marlunnik imaluunniit arlalinnik aqqutillit napparutikkut sianneqarsimasut.

10) Kabelit silaannakkoortut: Aqqutit tapinnaallisakkat kabeli tassaallutik imusat napparutitut nivinngarneqarsimasut.

11) Ungasissuseq mianerisassaq: Ungasissuseq aalajangerneqarsimasuq taanna tassaalluni isumannaallisaaanermi toqqissisimanartuutitaq, atortut innaallagiartortut eqqaanni imaluunniit taakkua ilaasa eqqaanni suliaqarnermi. Titartagaq 1-6 ilanngussami 1-imi takutinneqarpoq ungasissutsit mianerisassat qasertunngorlugit.

12) Qanoq pineqarneranik pilersaarut: Sumiiffiup suliffiusup aamma suliap qanoq annertutigineranik nassuiaassineq.

Kapitali 2

Entrepreneurip pisussaaffi

§ 3. Entrepreneurim ialiussaaq

1) ledningit pillugit paasissutissanik pissarsissaaq itersaliornissaaq, assaanissaaq, qillerinissaaq aamma nunamik naqittaalluni, suliaassat taakkua aallartitsinnagit,

2) annertunerusunik suliaqarnermi susoqarnissaanut pilersaarut suliaassap annertussusianut tunngasooq atortumik innaallagiartortumik piginnittumut, sulinerup aallartinneqannginnerani, nassutissavaa,

3) atortumik innaallagiartortumik piginnittup innersuussutai malissavai, kiisalu

4) atortumik innaallagiartortumik piginnittumut ajoqusiinerit, ajutumeernerit aamma ajutoornerit atortup innaallagiartortup eqqaani sulinermik ingerlatsinermut attuumassuteqartut suulluunniit tamaasa nalunaarutigissavai.

§ 4. Entrepreneurip sulisuni atortut innaallagiartortut eqqaanni suliaqartussat ilitersussavai aamma ilisimatissavai makku pillugit

1) atortup innaallagiartortup sumi inissisimaneramik,

2) najoqqutassami matumani aalajangersakkat,

- 3) atortumik innaallagiartortumik piginnittup innersuussutaanik, aamma
- 4) atortumik innaallagiartortumik piginnittup aqqa aamma attaveqarfigisassat pillugit paasisutissat.

Kapitali 3

Ledningit silaannakkoortut, kabelit silaannakkoortut aamma transformerstationit eqqaanni suliaqarneq

§ 5. Ledningit silaannakkoortut aamma kabelit silaannakkoortut eqqaanni suliaqarnermi ungasissuseq mianerisassaq sanimukaartoq, tak. imm. 2, aamma ungasissutsit mianerisassat ammukaartut, tak. imm. 3, qaangeqqusaanngillat, taamaattorli tak. imm. 4-5 aamma § 6.

Imm. 2. Ungasissuseq mianerisassaq sanimukaartoq tassaavoq nunamit 3 meterit, tak. ilanngussaq 1, titartakkat 1-4.

Imm. 3. Ungasissutsit mianerisassat ammukaartut tassaapput:

- 1) Ledninginut silaannakkoortunut sakkukitsumik sarfalinnut aamma kabelinut silaannakkoortunut sakkukitsumik sarfalinnut aqqummit avallermi tassaavoq 1,5 meterit, tak. ilanngussaq 1. titartakkat 1-2,
- 2) Ledninginut silaannakkoortunut sakkortuumik sarfalinnut 10-40 kV akornanniittunut aqqummit avallermi tassaavoq 6 meterit, tak. ilanngussaq 1, titartagaq 3, aamma
- 3) Ledninginut silaannakkoortunut sakkortuumik sarfalinnut 40 kV sinnerlugit aqqummit avallermi tassaavoq 15 meterit, tak. ilanngussaq 1, titartagaq 4.

Imm. 4. Maskiinanik nunalerinermut atortunik ingerlaneq imaluunniit atuineq imm. 1-imi ilaatinneqanngilaq, imaappat maskiina portussusia, inuit maskiinaamiittut ilanngullugit, matuminnga portunerunngippat

- 1) atortunit innaallagissamik sakkukitsumik sarfalinnit 4 meterit, aamma
- 2) atortunit innaallagissamik sakkortuumik sarfalinnit 4,5 meterit.

Imm. 5. Maskiina nunalerinermut atorineqartartoq aalasinnaasunik atortoqarpat, taakkua imm. 4-mi annerpaamik portussusissaq qaangersinnaallugu, taava qulakkeerneqassaaq maskiina atortuisa aalasinnaasut ingerlanerup nalaani imaluunniit maskiina nunalerinermut atorineqartartup atorineqarnerani, atortui aalasinnaasut aalajangerneqarsimanissaat taamaaliornikkut annerpaamik portussusissaq qaangerneqarsinnaajunnaarlugu.

§ 6. Suliaqarneq, § 5-imi ungasissutsit mianerineqartussat eqqortillugit, ingerlanneqarsinnaanngippat, taava suliaq ingerlanneqarnissaanut atatillugu atortumik innaallagiartortumik piginnittumut sukumiinerusumik ilitserisorneqarnissaq pissarsiarineqassaaq.

§ 7. Ledningit silaannakkoortut sakkukitsumik sarfallit aamma kabelit silaannakkoortut sakkukitsumik sarfallit qulaallugit suliaqartoqarsinnaavoq, imaappat ledningi qulaallugu ungasissuseq mianerineqartussaq 1,5 meteriusoq eqqortinneqarluni, tak. ilanngussaq 1. titartagaq 2.

§ 8. Ledningit silaannakkoortut ataanni atortussianik assallugit qaqqinneqarsimasunik imaluunniit qaavini qaleruaaneqarsimasunik ungasissutsip mianerineqartussap sanimukaartup iluatungaani,

taamaallaat inissiisoqarsinnaavoq atortumik innaallagiartortumik piginnittup isumaqatigiissuteqarfigineqarnerata kingornatigut.

§ 9. Napparutit imaluunniit transformerstationit eqqaanni ima qanitsigisumi assaasoqassanngilaq, tamatuma kingunerisaanik taakkua uppinnissaat imaluunniit sisoottoornissaat navianalersinnaalluni.

§ 10. Maskiinat imerterutit imaluunniit taakkua ilaat attorlugit ulorianalersinnaallutik, tassa ledningit silaannakkoortut sakkortuumik sarfallit serpartarneqartillugit, mianersornissamut erseqqissumik aamma qajannaatsunik allagartalerneqarsimassapput.

Imm. 2. Mianersornissamut allagartani ISO standard 7010: xxxx, qaqugukkulluunniit atuuttoq eqqortinneqassaaq.

Kapitali 4

Kabelit nunap iluaniittut eqqaanni suliaqarneq

§ 11. Kabelit nunakkoortut taakkununga ilanngullugit kabelinut sikaaviit aamma kabelinut karsit eqqaanni suliaqarnermi, sulineq imatut piareersarneqassaaq ajortitsisoqarnissaa pinngitsoorneqartussanngorlugu.

Imm. 2. Suliaqarnissaaq aallartinneqartinnagu atortumik innaallagiartortumik piginnittumit innersuussutit pissarsiarineqassapput imatut pisoqartillugu:

- 1) Nunami suliaqarnermi ungasissutsip mianerineqartussap iluani kabeli nunakkoortumit 1 meteri, tak.. ilanngussaaq 1, titartagaq 5.
- 2) Kabelinik nunamiittuni qulaarlugit assaanermi.
- 3) Kabelimi qulaarlugu assanneqarsimasumik maskiinat atorlugit ajoqusiinissaaq aarlerinarpat.

Imm. 3. Nalinginnaasumik naatsiivilerineri nunami suliaqarnermut atatillugu imm. 2 atuutinngilaq.

§ 12. Atortussianik kabelit innaallagissamik sakkortuumik sarfallit qaavinut inissiinissaaq taamaallaat pisinnaavoq atortunik innaallagiartortunik piginnittumik isumaqatigiissuteqarnerup kingornatigut.

§ 13. Nalunaaqutsersuineri aamma matoorineri atortut kabelinut nunamiittunut atorineqartut atortumik innaallagiartortumik piginnittoq akuersiteqqaarnagu peerneqaqqusaanngillat.

Kapitali 5

Ajutoortoqartillugu qanoq iliornissamut maleruaqqusat

§ 14. Atortoq innaallagiartortoq sarfaqartutut isigineqassaaq imaanngippat atortumik innaallagiartortumik piginnittup, uppersarsimagaa atortoq sarfaarutsinneqarsimasooq.

Imm. 2. Atortoq innaallagiartortoq arlaannit attuutsitsivigineqarsimappat imaluunniit innaallassimappat, taava attuutsinneqarsimasooq sarfaqartutut isigineqassaaq.

§ 15. Sunaluunniit sarfamik ingerlaffigineqartoq, ledningit nakkarsimasut imaluunniit kabelit ajoquserneqarsimasut, taava ungasissutsimut mianerineqartussat ima isorartutigisut malinneqassapput:

- 1) Atortunut sakkortuumik sarfalinnut 10 meterit.
- 2) Atortunut sakkukitsumik sarfalinnut 2 meterit.

§ 16. Ajutoortoqartillugu imaluunniit ajunaartoqartillugu entreprenørip imaluunniit taassuma sulisuisa piaarnerpaamik atortumik innaallagiartortumik piginnittoq ilisimatissavaat, makku pillugit:

- 1) Sumi, ajutoorneq imaluunniit ajunaarneq pisimansoq.
- 2) Ajutoorneq imaluunniit ajunaarneq pillugu nassuiaassut.

Imm. 2. Entreprenøri aamma taassuma sulisui atortumik innaallagiartortumik piginnittup, taassuma sinniisuutitaata imaluunniit politiit sumiiffimmut tikiunnissaasa tungaanut imaaliussapput:

- 1) sumiiffimmi sissuertuussapput aamma
- 2) isumagissavaat inuit navianartoq pillugu aamma ungasissuseq mianerineqartussaq pillugu mianersoqquneqarnissaat, tak. § 15.

Kapitali 6

Pineqaatissiissutit

§ 17. Unioqutitsineq makkuninnga §§ 3-10, § 11, imm. 2, §§ 12-13 aamma §§ 15-16, pillaammik akiliisin-neqarnermik kinguneqarsinnaapput.

Imm. 2. Inuit inatsisitigut pisinnaatitaasut pisussaataasullu pillaammik akiligassamik akiliisussanngortin-neqarsinnaapput Kalaallit Nunaanni pinerluttulerinermi Inatsit naapertorlugu.

Imm. 3. Pillaammik akiliisitsinerit nalunaarut naapertorlugu Nunatta Karsianut nakkartinneqassapput.

Kapitali 7

Atuutilersitsineq

§ 18. Nalunaarut atuutilissaaq ulloq, 1. januaari 2020

Innaallagissiornermut Oqartussat, ulloq 12. december 2019

Michael Petersen

/

Jane Lynge Hansen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut